

**Қазақстан Республикасының Үкіметі мен Беларусь Республикасының Үкіметі арасында
Ақпаратты қорғау саласындағы ынтымақтастық туралы келісім жасасу туралы**

Қазақстан Республикасы Үкіметінің 2005 жылғы 18 мамырдағы N 473 Қаулысы

Қазақстан Республикасының Үкіметі **ҚАУЛЫ ЕТЕДІ:**

1. Қазақстан Республикасының Үкіметі мен Беларусь Республикасының Үкіметі арасындағы Ақпаратты қорғау саласындағы ынтымақтастық туралы келісімнің жобасы **мақұлданды.**

2. Қазақстан Республикасының Премьер-Министрі Кеңесінің Басшысы Алтай Абылайұлы Тілеубердинге қағидаттық сипаты жоқ өзгерістер мен толықтырулар енгізуге рұқсат бере отырып, Қазақстан Республикасының Үкіметі атынан Қазақстан Республикасының Үкіметі мен Беларусь Республикасының Үкіметі арасында Ақпаратты қорғау саласындағы ынтымақтастық туралы келісім жасасуға өкілеттік **берілсін.**

3. Осы қаулы қол қойылған күнінен бастап қолданысқа енгізіледі.

Қазақстан Республикасының

Премьер-Министрі

Жоба

**Қазақстан Республикасының Үкіметі мен Беларусь
Республикасының Үкіметі арасындағы Ақпаратты
қорғау саласындағы ынтымақтастық туралы
КЕЛІСІМ**

Бұдан әрі Тараптар деп аталатын, Қазақстан Республикасының Үкіметі мен Беларусь Республикасының Үкіметі,

Қазақстан Республикасы мен Беларусь Республикасының мемлекеттік саясатын жетілдіру және ақпаратты қорғаудың ұлттық жүйелерін одан әрі дамыту мақсатында,

1993 жылғы 22 қаңтардағы ТМД-ға қатысушы мемлекеттер үкіметтерінің арасындағы мемлекетаралық құпияларды қорғауды өзара қамтамасыз ету туралы келісімді **басшылыққа ала отырып,**

ақпаратты қорғау саласындағы екіжақты қарым-қатынастарды реттеу қажеттілігін **негізге ала отырып,**

ынтымақтастықты дамытуда бірдей мүдделілік таныта отырып,

Тараптардың әрқайсысының жаңа ақпараттық технологияларды, ақпаратты қорғау құралдары мен жүйелерін әзірлеудегі және енгізудегі жетістіктерін ескере отырып,

ақпараттық технологияларды, ақпаратты қорғау құралдары мен жүйелерін тарату мен пайдалану екі Тараптың мүдделерін қозғайтындығын атай отырып, осы саладағы кең ынтымақтастық оңтайлы тиімділікті қамтамасыз етуге ықпал ететіндігін атай отырып, мына төмендегілер туралы келісті:

1-бап

Осы Келісімде пайдаланылатын ұғымдар мыналарды білдіреді:

"ақпаратты қорғау" - ұйымдастырушылық, құқықтық, техникалық, технологиялық шаралармен ақпараттың құпиялылығын, тұтастығы мен қол жетімділігін қамтамасыз етуге бағытталған қызмет;

"құпия ақпарат" - Тараптар мемлекеттерінің ұлттық заңнамаларына сәйкес немесе олардың өзара шарттасуына сәйкес таралуына шектеу қойылатын ақпарат;

"ақпаратты қорғау құралдары" - ақпаратты қорғауға арналған құралдар, олар іске асырылатын құралдар, сондай-ақ ақпаратты қорғау тиімділігін бақылау құралдары.

2-бап

Тараптар оның таралуы Тараптар мемлекеттерінің мүдделеріне залал келтіруі мүмкін құпия ақпаратты қорғау саласындағы ынтымақтастықты жүзеге асырады.

Тараптар жалпы танылған нормаларға және халықаралық құқық қағидаттарына сәйкес ақпаратты қорғау саласындағы қатынастарын өзара сыйластық, Тараптар мемлекеттерінің теңдігі, олардың мүдделері және ұлттық қауіпсіздік саласындағы құқықтарын тану, зияткерлік және өзге де меншікті қорғау негізінде құрады.

3-бап

Осы Келісімді іске асыру мақсатында Тараптар мына бағыттар бойынша ынтымақтасады:

ақпаратты қорғау саласындағы жай-күй, даму үрдістері, әлемдік және ұлттық жетістіктер туралы ақпаратты талдау және онымен алмасу;

ақпаратты қорғау саласындағы нормативтік құқықтық базаны дамыту және жетілдіру;

ақпаратты техникалық қорғау саласындағы ғылыми-техникалық өнімді әзірлеу, өндіру және пайдалану;

ақпаратты қорғау саласындағы нормативтік-әдістемелік құжаттарды, соның ішінде техникалық барлауларға қарсы іс-қимыл жасау, ақпаратқа рұқсатсыз қол жеткізуден қорғау, оның тұтастығы мен қол жетімділігі жөніндегі кесімдерді дамыту және жетілдіру;

лицензиялау, сертификаттау және аттестаттау жүйелерінің жұмыс істеу тетіктерін жетілдіру, соның ішінде ақпаратты қорғаудың ендірілетін құралдары мен кешендерінің тиімділігін растайтын сертификаттар мен басқа да құжаттарды өзара тану тәртібін әзірлеу мәселелері жөнінде консультациялар өткізу;

ақпаратты қорғау мәселелері жөнінде бірлескен ғылыми конференциялар, симпозиумдар, көрмелер өткізу;

тиісті жоғарғы оқу орындарының түлектеріне және ақпаратты қорғау саласындағы мамандарға қойылатын келісілген біліктілік талаптарының негізінде кадрларды даярлау, қайта даярлау және біліктілігін арттыру.

4-бап

Тараптар осы Келісімнің шеңберінде алынған немесе екінші Тарап 1993 жылғы 22 қаңтардағы Мемлекетаралық құпиялардың сақталуын өзара қамтамасыз ету туралы келісімге сәйкес берген құпия ақпаратты қорғауды қамтамасыз ету жөніндегі қажетті шараларды қабылдайды.

Осы Келісімнің шеңберінде Тараптар алынған құпия ақпаратты қорғаудың оны алатын мемлекеттегі осындай ақпаратқа қатысты ұлттық заңнама шеңберінде қолданылатын режимге ұқсас режимді қамтамасыз етуге, сондай-ақ құпия ақпаратты басқа Тараптың алдын ала жазбаша келісімінсіз үшінші тарапқа бермеуге міндеттенеді.

5-бап

Осы Келісімнің мақсаттары үшін:
Тараптар мемлекеттерінің құзыретті органдары:
Қазақстан Тарапынан - Қазақстан Республикасы Премьер-Министрінің Кеңесі,
Беларусь Тарапынан - Беларусь Республикасы Президентінің жанындағы
Ақпараттың қауіпсіздігін қорғаудың мемлекеттік орталығы болып табылады.

6-бап

Тараптар ақпаратпен және құжаттармен алмасу туралы, ақпаратты техникалық қорғауды қамтамасыз ету құралдарын, приборларды, жабдықтарды, материалдар мен жинақтаушы бұйымдарды жеткізу туралы шешімдер қабылдаған жағдайда олардың номенклатурасы, көлемдері мен мерзімдері осы Келісімнің 5-бабында белгіленген Тараптар мемлекеттерінің құзыретті органдарының арасындағы екіжақты жеке хаттамалармен айқындалады.

7-бап

Осы Келісімді іске асыру мақсатында Тараптар келіссөздер жүргізуі және бірлескен жұмыс топтарын құруы мүмкін.

8-бап

Осы Келісім шеңберінде жүргізілетін іс-шараларды қаржыландыруды Тараптар өздері әрбір іс-шара бойынша келіскен тәртіппен және шарттарда жүзеге асырады.

9-бап

Тараптардың осы Келісімнің ережелерін іске асыру бойынша өзара іс-қимыл жасауы кезіндегі жұмыс тілі орыс тілі болып табылады.

10-бап

Осы Келісімнің ережелерін түсіндіру немесе қолдану жөніндегі дауларды шешуді Тараптар келіссөздер және өзара консультациялар жолымен жүзеге асырады.

11-бап

Тараптардың өзара келісуі бойынша осы Келісімге өзгерістер мен толықтырулар енгізілуі мүмкін, олар осы Келісімнің ажырамас бөлігі болып табылатын хаттамалармен ресімделеді.

12-бап

Осы Келісім Тараптардың оның күшіне енуі үшін қажетті мемлекетішілік рәсімдерді орындағандығы туралы соңғы жазбаша хабарлама алынған күнінен бастап күшіне енеді.

Осы Келісім белгіленбеген мерзімге жасалады және Тараптардың бірі екінші Тарапқа оның қолданысын тоқтату ниеті туралы жазбаша хабарлағанға дейін күшінде қалатын болады. Бұл жағдайда екінші Тарап осындай хабарламаны алғаннан кейін алты ай өткен соң осы Келісім өз қолданысын тоқтатады.

200_ жылғы "___" _____ қаласында әрқайсысы қазақ, беларусь және орыс тілдерінде екі түпнұсқа данада жасалды, әрі барлық мәтіндердің күші бірдей.

Осы Келісімнің ережелерін түсіндіру кезінде келіспеушіліктер туындаған жағдайда Тараптар орыс тіліндегі мәтінге жүгінетін болады.

Қазақстан Республикасының
Үкіметі үшін

Беларусь Республикасының
Үкіметі үшін

© 2012. Қазақстан Республикасы Әділет министрлігінің «Қазақстан Республикасының Заңнама және құқықтық ақпарат институты» ШЖҚ РМК